

gegeben werden / auch vber alle Ketardata / zu itzlichem Artikel ein sonderlich Buch haben / zu denselben Büchern / sol ein kasten oder lade / verordnet werden / darzu der Berckmeister / einen / vnd der Berckschreiber / jedes orts / auch einen schlüssel haben / vnd dorein alle mal die Bücher / so man dero / zum einschreiben nicht gebraucht / vorschliessen sollen / Vnd was der obbestimbtten stück vnd dergleichen Berckhendel / inn beywesen des Berckmeisters vnd Geschwornen / inn angezeigte Bücher / nicht eingeschrieben wirdet / soll vor vnkrefftig geacht vnd gehalten werden.

Von Zubus Brieffen.

Der Berckschreiber / sol auch alle zubus brieffe / sambt des Berckmeisters Schreiber / zu gleich schreiben / vnd auch gleichen genies / doch beyde von einem brieffe / vber einen groschen nicht nehmen.

Ein jeder Berckschreiber / sol auch das quattember gelt (so jeder Vorsteher oder Schichtmeister / zu vnterhaltung ver Geschwornen / vnd ander gemeins Berckwergs notturfft / von itzlicher bauenden zechen / alle wochen ein halben groschen / vnd von einer frist zechen / drey pfenning / geben sol) einnehmen / ausgeben / vñ berechnen / Doch das darzu ein feste sonderliche lade / in der Zehentner gemacht / darzu vorordnet / darzu drey schlüssel gehöre / dero einen der Oberhauptman / den andern der Zehentner / vnd den dritten / der Berckschreiber / haben / dorinn das gelt vnd die Register / darüber alzeit vorschlossen werden sollen.

Der Xij. Artikel.

Von des HüttenReutters Ambt.

B iij Die